


第四門 瞻視病人

瞻視病人中分為四章



第一章 制意

▲事鈔云「制意者。夫有待之形、多諸嬰累。四大互反、六府成病。若不假相提接、薄命則無所託。然則世情流變、始終難一。健壯則親昵、病弱則捐捨。鄙俗恆情、未能忘此。故如來深鑒人物、知善未崇、惡必相遵、故親看病。」資持釋云「初敘意中、初敘病患多。嬰累者通目眾苦也。四大等者別示病惱也。若下次明瞻視。然下三示凡情。故下彰聖引導。按西域記、祇桓東北有塔、即如來洗病比丘處。如來在日、有病比丘含苦獨處。佛問、汝何所苦、汝何獨居。答曰、我性疏懶、不耐看病、故今嬰疾無人瞻視。佛愍而告曰、善男子、我今看汝。」

△事鈔續云「故律中。佛言、汝曹不相看視、誰當應為。乃至世尊為病人洗除大小便已、掃治臥處極令清淨、敷衣臥之。便立制云、自今已去、應看病比丘、應作瞻病人。若有欲供養我者、應供養病人。佛為極地之人、猶勵諸比丘、親自下接、況同法義、重如何相棄。」資持釋云「二引證中、初引緣。便下立制。」